

Ils giuvenis scriptuors han persvas cun tensiun e fantasia

La giuria da la concorrenza da scriver rumantsch «pledierla», organisada da la Lia Rumantscha, ha erui ils vendschaders da las quatter differentas categorias. Quels han pudü preleger lur texts a Zernez.

NICOLO BASS



Amo schurnalists, scripturs ed auturs nu suna. Ma il prüm pass es uossa fat. La generaziun giuvna ha persvas cun texts captivants, interessants e cun blera fantasia. Il tema da la concorrenza da scriver «pledierla» es stat «l'an 2119 in terra rumantscha». Da schner fin bod la fin d'avrigl han ils uffants e giuvenils fin 25 ons gnü temp d'inoltrar lur ouvras litteraras. «Nus eschan stats fich surprais da la gronda partecipaziun», ha infuormà Martina Schuler da la Lia Rumantscha in gövgia saira i'l Auditori dal Parc Naziunal Svizzer a Zernez in occasiun da la premiaziun da la concorrenza «pledierla». In tuot 155 texts sun entrats illas quatter differentas categorias. In seguit ha la giuria cull'atura e schurnalista Fadrina Hofmann da Scuol, cul magister Chasper Valentin da Puntraschigna e cul schurnalist e redacter da la Posta Ladina Nicolo Bass, let mincha text ed els han erui in plü-

sas sezzüdas ils vendschaders. Ils prüms trais da mincha categoria han lura pudü preleger lur text in gövgia a Zernez.

Il prüm pass in üna lunga carriera

La fantasia es statta infinita ed ils uffants e giuvenils han let avant lur istorgias d'amur, da guerra, lur crimis cun mordrarschs ed invouls, e lur poesias litteraras e pensivas. «Vus eschat tuots feghers», ha dit Fadrina Hofmann als uffants e giuvenils preschaints. Eir ella es statta avant ün quart tschientiner illa situaziun dals uffants ed ella ha guadagna quella jada il premi da «pledierla» ed ha pudü leger avant sia prüm'istorgia. Quai es stat eir per Fadrina Hofmann il prüm pass in üna lunga carriera cun bleras istorgias e cudeschs publichats. Sco cha Hofmann ha infuormà als preschaints, saja l'Engiadina'Ota statta plü creativa co l'Engiadina Bassa. Uschè s'han partecipadas in tuot desch classas da scoula da l'Engiadina'Ota e be quatter classas da l'Engiadina Bassa a la concorrenza da scriver rumantsch. «Perquai nun esa da dar da buonder cha'ls texts puters domineschan», ha constatà l'atura e schurnalista. Ün insaj da las prelecziuns as survain cun activar il video chi'd es zoppà illa fotografia da la premiaziun a Zernez.

Ils vendschaders da «pledierla»

Illa prüma categoria (3./4. classa) ha guadagnà il text da Lina-Margaritta Salzgeber da S-chanf la concorrenza da scriver rumantsch. La seguonda piazza ha ragiunt Flurin Thoma da S-chanf, seguind dad Anina Casty da Zuoz. Il vendschader da la seguonda categoria (5./6. classa) es Flurin Salzgeber da S-chanf. El



Ils vendschaders da la concorrenza da scriver rumantsch «pledierla» han preschantà lur texts a Zernez. Cull'app «EngadinOnline» as poja activar il video cun ün insaj da las prelecziuns.

fotografia: Reto Stifel

es il frar da la vendschadra da la prüma categoria. Sülla seguonda piazza da quista categoria es Morena Malgiaritta da Samedan e piazza trais ragiundscha Annastasia Sala da Samedan. Cun seis text fich emoziunal ragiundscha Lucas Candinias da Samedan la prüma piazza illa categoria trais (7.-9. classa). Culla poesia pensiva e da pacs plets ragiundschan Fabio Lehner e Roman Alder da l'Academia

a Samedan la seguonda piazza. Piazza trais ragiundscha il «S-chuoziener» Flurin Bott da S-chanf. La categoria dals giuvenils da 17 fin 25 ons vain dominada da l'Academia da Samedan. Guadagnada vain la categoria da Selina Duschletta da S-chanf cun ün versin. La seguonda piazza ha ragiunt Luisa Bott da S-chanf e rang trais va a Melanie Baumgartner per seis versin da las «Dronas dal destin».

Ün dals rangats da la cuncurrenza «pledierla 2019» das-cha lura preleger seis text in occasiun dal gibileum da 100 ons Lia Rumantscha, e quai als 18 avuost a Zuoz. Tuot ils text dals prüms trais da mincha categoria vegnan lura publichats tanter las vacanzas da stà e las vacanzas d'utuon illa Posta Ladina, chi ha accompagnà la concorrenza da scriver rumantsch cun plü artichels.

Dudesch uras sainza forza electrica

Susch In venderdi, ils 7 gën avantmezdi es gnüda interruotta la forza electrica a Susch. Sco cha las Ouvras Electricas Engiadina (OEE) comuniceschon, es stat ün defet da las lingias illa via maistra pro la fabrica da la Güstizia tanter Susch e Zernez il motiv per quist'interupziun. Ils respunsabels vöglan uossa sclerir, scha quist defet haja da chefar

cullas lavuors in quist plazzal da fabrica. Il servezzan da piquet ha gnü d'installar üna lingia provisorica e quista lavur ha düra lung temp. Uschè es restada la fracziun da Susch fin dudesch uras sainza forza electrica. In üna comunicaziun a las medias as s-chüsan las OEE per quist impach e sperescha sün inceletta dals pertocs. (pl)

Arrandschamaint

Girun, alvetern e cumpagnia

Fuldera I'l Chastè da Cultura ha lö in marcurdi, 19 gën, a las 20.15 ün referat illustrà cul titel «Bartgeier, Edelweiss & Co. – Biodiversität in der Val Müstair». Tuot las fotografias sun gnüdas fattas dal referat Valentin Pitsch e quai uni-

camaing in Val Müstair. L'arrandschamaint düra raduond duos uras. Ulteriuras infuormaziuns da l'arrandschamaint as survain suot: Gäste-Info Val Müstair, telefon 081 861 88 40 opür info@val-muestair.ch. (protr.)

Imprender meglder rumantsch

der Finger	il daunt / daint
das Fingerspitzengefühl	il tact
das Fingerspitzengefühl	la sensibilited / sensibilità
die Fingerübung	l'exercizi per la daunta / dainta
der Fingerzeig	il tschegn
der Fingerzeig	l'indizi
keinen Fingerbreit nachgeben	nu ceder niaunch'ün pass / nianca ün pass
etw mit den Fingerspitzen fassen	plücher / plüchar qchs
der Fuss	il nà

Giuven e vegl in cuorsa tras Scuol

Avant bundant ot mais ha Svenja Ammann da Tarasp decis d'organisar i'l rom da sia lavur da matura üna cuorsa d'atletica ligera tras la fracziun da Scuol. Uossa ha ella pudü racogliar ils früts da si'organisaziun.

«Eu stoss dir cha'l cumanzamaint n'ha ja propcha suotvalütà la lavur chi'm spetta cull'organisaziun da quist evenimaint, ma sch'eu vez uossa tuot ils participants quia, possa propcha dir cha la lavur haja valü la paina.» Cun quists plets ha Svenja Ammann bivgnantà las curriduras ed ils curridurs a la rangaziun da la cuorsa «Tras Scuol». Tuot in tuot ha ella scumparti insembel cun seis voluntaris 99 numers da partenza a curriduras e curridurs da las etats da quatter fin settanta ons. Els nun han sustgnü cun lur partecipaziun a la cuorsa be la lavur da matura dad Ammann, dimpersè eir la Fundaziun da cours svizra.

Sustegn per paziants da cour

«La sandà dal cour am sta a cour our da scopos fich persunals», disch Svenja Ammann, chi ha gnü dachefar in sia famiglia ed i'l ravuogl da cuntshaints ed

amis fingià plüssas jadas cun malatias da cour. Pervi da quai ha la maturanda decis da dar tuot il guadogn da la cuorsa a la Fundaziun da cours svizra. «Ils raps dessan ir a favur da las uschedittas loipas da cour. Quai sun loipas planivas chi sun equipadas cun defibrillaturs e chi dessan pussibilitar a persunas cun cours debels da far sport e trenar lur cours», spiega la giuvna. Sper l'aspet social, d'eira per Ammann eir important d'organisar la cuorsa uschè insistent sco pussibel. Pervi da quai ha ella sport pro l'ustaria be bavrondas our da butiglias da vaider ed ha desisti a plats ed üsaglias da plastic.

Tras las giassas da Scuol

Il traget da la cuorsa principala ha manà da la partenza pro la chasa da scoula da Scuol sper la piazza da Bügl Grond, vers Tulai e lura vi Gurlaina. Da là ha la via manà ils curridurs sur la punt da lain darcheu a Scuol suot, sur l'auai da Clozza ed inavo vers la chasa da scoula. Pels participants, chi han chattà la via a Scuol dafatta sur ils cunfins dal chantun oura, ha la cuorsa sport uschè eir la pussibilità d'imprender a cugnuscher il cumün. «Il traget d'eira pretensius e fich varià. Eu n'ha vis il cumün cun tuot oters ögls davo quista cuorsa», ha manià üna participanta. Sü'l traget da trais kilometers e mez d'eira pro alch

per minchün, ha manzunà ün curridur: «Ils tocs chi giaivan aval nu vaiva tant gugent, ma cuorrer stip sü pellas giassas am ha plaschü fich bain.» Eir pels plü pitschens sportists ha Svenja Ammann procurà per üna pussibilità da tour part a l'occurenza. Il «Kids Run» ha manà in tuot il parc cun piazza da giovar sper la chasa da scoula. «Ils uffants sun cuorriüts üna, duos o trais rundas tenor lur età», ha declarà l'organisatura.

Ün di plain emoziuns

Davo ün lung temp da preperaziun ed organisaziun, es Svenja Ammann statta surleivgiada e cuntainta cun l'andamaint dal di da cuorsa: «Eu sper cha vus tuots hajat giodü quist di uschè sco eu, e cha vus possat tuornar a chasa cun ün bun sentimaint e culla conscienza, cha vus vaivat be fat alch bun per voss'aigna sandà, ed eir pella sandà da paziants da cour.» Ils participants han onurà sia lavur cun ün applaus, e bleras vuschs han giavüschà da pudair far part ad ün'ulteriura ediziun dal «Tras Scuol». Eir l'organisatura svesa füss pronta da far insacura darcheu üna cuorsa, ma uossa vala il prüm amo da finir la part teoretica da la lavur da matura. (anr/sp)

La glista da rangs cumpletta as chatta sün www.tras-scuol.ch

Arrandschamaint

Prolog pel gibileum da 100 ons in Val Müstair